

Diwylliant!!

(20260629)

Gŵyl ddifyr pêl-droedwyr drud - â'i chewri'n
Cyd-chwarae, 'n cyd-symud;
A mwyn yw pob un munud
Yn byw am Gwpan Y Byd!

(Gêmau grŵp Cwpan Y Byd yn dod i ben, a'r cyffro'r dechrau!)

Esty

(20260627)

Iddewes wiw'n ffoi caethiwed - o'i chrud
A'i chredo cyn llymed;
A chwmni grym miwsig med
Nawn hon, gras anuniongred.

(Gwylio'r gyfres "Unorthodox" ar Netflix. Gwych.)

NewidHinsawdd

(20260626)

Ein cyflafan bydd anwes haul dibaid
Ag enaid or-gynnes;
Dyna yw risg y don wres:
Deallwn achos ein dylles?

(Y don wres waethaf yn Ewrop a recordiwyd erioed.)

YSiwrnai

(20260621)

Ar yr hewl i 'ngorwelion - ar gamre
Drwy Gymru, gwydr eigion
Awr deg Bae Ceredigion,
Hiraeth olyniaeth y lôn.

(Gyrru nôl o GG i Ruthun, dros y mynydd o Temple Bar i Lanrhystud, â Bae Ceredigion yn ei holl
ogoniant. Gwrando ar Yr Almaen yn erbyn Côte D'Ivoire o Gwpan y Byd ar Radiožurnál Český
Rozhlas a chyrraedd adref am 10.30yh, â hi'n dal yn olau.)

Y BorderBach

(20260611)

Daeth chwyldro wedi strimio'r strach - a gwên
Begonia'n lle'r smonach;
Daeth hyder i'r border bach,
A'i lun sydd llawer glanach!

(Gweithio tan 10.30yh neithiwr, noson hyfryd o haf!)

YSied
(20260610)

Os briwsiongar bo arbed - da llunio
Crud llanast cyn waeled;
Y gorau oedd cael gwared
Â'm "trysor", er siapio'r sied.

(Golwg y sied wedi gwella'n aruthrol.)

Ychwanegiad
(20260608)

Hunaniaeth Watts a Jonathan, a byw
Teulu bach yn gyfan;
I Twm ac Emma baban
Daw'n llwyrfodd, yn rhodd i'w rhan.

(Haleliwia!)

AOesRhyddid?
(20260602)

Llid y gwir, ni ellid gwaeth na'r drysni'n
Rheoli'n realaeth;
Trallod rhyddid gwybodaeth;
Sen y gwir: aros yn gaeth.

(Caerhirfryn yn cael ymholiad rhyddid gwybodaeth, yn amlwg â'r bwriad o greu trafferth heb egwyddor.)

NaStrom
(20260527)

Kaple pen tyle potom - afon fyw
Rovnováha ynom;
Tichost yn llifo drostom,
Gwawr ystyr uwch ger y strom.

(Mynd i redeg gyda V i'r onnen ar ben y bryn yn Skřivan penwythnos diwethaf.)

Procházka
(20260523)

Jít ven. Můj sen. Fy syniad - pêr awen
Sí projít fy mwriad;
Yn hapus gyda'm nápad
Jdu ven. I'r Heulwen. Na hrad!

(J. â sraz ysgol, a minnau'n cerdded na řeku ar hyd Národní Třída, a pak jsem prošel Kampu, lan ar hyd Nerudová na hrad, ze schodů dolů na Malostranskou a nöl i Muzeum.)

BlodauYmenyn
(20260521)

Mor hardd yw chwardd hen deulu'r chwyn - teulu
Petalog y dyffryn
Eiliad cyffro bro a bryn,
Dyma eiliad y melyn.

(Mynd i redeg cyn y daith i Praha, â'r ddol yn llawn lliw.)

Hwre!
(20260519)



Mae'n glên, ac mae'n wên ac mae'n iach - mae'r ferch,
Mae'n fwy ac ystwythach;
A honno'n flwyddyn hynach,
Neis i fod 'da Mis Jôn Fach!

(Penblwydd G. yddoe!)

YNewyddion
(20260516)

Anfad yw'r cyfweiliadau - dan lloerig,
Siomedig amodau;
Cywaith gobaith sydd ar gau,
Â llanast llenwa'r lluniau.

(Ar wahân i obaith newydd Cymru fach, mae'r newyddion o dros y byd yn torri calon dyn.)

UnFunedFach
(20260509)

I'n cilfan, cyffro'r coelfain - lleu hanes
Llawenydd arwyrain
Bore 'fory'r Gymru gain;
I bau uwch â'r rhai bychain.

(Waldo: "Daw dydd y bydd mawr y rhai bychain".)

Crwydrwr
(20260507)

Gwelaf hanner awr golau - ôl unig
Planed uwch y brynïau
I anwesu fy nosau:
Heno, eto, gwelaf lau.

(lau yn glir uwch Coed Marchan wrth fynd i'r gwely yn ddiweddar, yng nghytser yr Efeilliaid.)

Rhediad
(20260503)

O 'nabod diweddebau - ochenaid!
Rhaid ymarferiadau
I weld tlysni'r gwir o'r gau,
Rhaid câr wrth rhedeg geiriau!

(Adolygu rhediad geiriau a berfau Tsieceg cyn mynd i Praha!)

Newid
(20260502)

O'n hoed ar chwâl, drwy chwildro - ag abwyd
Gobaith unwaith eto,
Ynof eisiau canfasio:
Daw bore haul - newid bro!

(Canfasio 'ddoe am y tro cyntaf, a phenderfynu mynd heddi' a dydd Llun hefyd!)

Sotra
(20260425)



I Norwy mewn awyren - i wreiddiau'r
Hen ryddiaith er darllen
Am rethreg y garreg wen,
Byw argoel ardal Bergen.

(Wythnos hyfryd ger Bergen, ym myd y graig gwenithfaen, er bod y teithio yn flinderus.)

ITwmAcEmma

(20260420)

aeth Ho-Gyn i-fanc / o Ru-thun dre
a-LLan l'r byd mawr / i ffeindio'i le
Cwr-DDodd a ge-neth / ei Emma ben aur
A gwir i chi / He-ddiw / Dy -ma ni!

now E-Mma / she's a / volcanologist
it's Fun To see her / when she gets tip-sy
Queen of baking / top ca-a-lo-ry
It's plain to see / Right now /

we Wish You / both a / life of happiness
of Un-Derstanding / and no distress
Full Of loving / no more and less
It's ea-ea-sy / Right now / Can't you see?

(Ymgais i wneud geiriau i "All You Need Is Love" ar gyfer T ac E.)

PriodasAur

(20260418)

Yno 'da John a Sheena'n creu cyffro
Wrth gofio'r daith gyfan;
Geiriau "Tra bo dau" yn dân
Goruwch aur, goruwch arian.

Mae John a Shee- / -na'n dathlu y dydd /
Mae'n ben-blwydd ar-be- / -ni-ig iawn /
A môr o ga- / -nu y-ma a fydd /
De-chreu-wn fel hyn / pe cawn /

CYTGAN

Ha-ppy ha-ppy / a-nni-ve-rsa-ry /
To John and to Shee- / na-a too /
Ha-ppy ha-ppy / a-nni-ve-rsa-ry /
From a-all of us / to you /

We'd like to say / to you on this day /
No matter the turns / that life sends /
We'd like to say / on this GOLDEN day /
That you'll a-lways be / our friends /

CYTGAN

(Cytgan:
Cyfoeth nid yw ond oferedd
Glendid nid yw yn parhau
Ond cariad pur sydd fel y dur
Yn para tra bo dau)

(Parti penblwydd priodas aur J a Sh neithiwr yn y clwb rygbi, â chriw bach yn canu Tra bo dau.)

Swti
(260418)

Â'i rhediad llawn direidi - mae tymer
Go dyner amdani;
A siglo'i chwt gwna Swti
'Mhob egwyl, mae'n hwyl 'da hi!

(Mynd o redeg i ben mynydd 'da'r chi wythnos diwetha!)

PedwarLlyn
(20260410-12)

'Da'r llif i le'r Pedwar Llyn
Yr aethom o dref Rhuthun;
Â serchus werth o chwerthin
I blwyf yr amaethwyr blin.

Cytgordiau y parau pur
'Nawr o hafan y rwyfwyr;
Borum dyfroedd y Berw'n
Nawdd hael i'r gwirionedd hwn:
Tinc y sill, tân cysylltiad
Hynod lyw'n uno dwy wlad.

Ym mhabell her y meibion,
Meidrol chwant gweld llwyddiant llon:
Gorau em, ein hanthem ni,
Swil alaw'r Si Hei Lwil;
Ac yn y man, Tir Na'n Og
O garnau'n Hela'r 'Sgwarnog.

At her y côr agored
Â'n criw yn gadarn eu cred
Mewn gwyrth! Trwy'r pyrth i'r perthyn
Am wybod uwch Mab Y Dyn;
Â'r darn gorau o deyrnged,
Mawrhad Phyllis a Mered.

'Da'r llif o le'r Pedwar Llyn - 'di blino
Heb lais am lwnccdestun;
Cinio Sul, crwydro Dulyn:
A'm mêr nos, i Gymru'n un.

(Taith MM i'r Iwerddon i'r Wyl Ban-Geltaidd yng Ngharlow (sef "Pedwar Llyn", mae'n debyg, yng Ngwyddeleg), ar yr afon Barrow (sef "Berw" yng Ngwyddeleg).)

WelDymaHyfrydFan
(20260412)

Mynnyd awr i'm henaid wan - yn glwyfus,
Fe glywaf y gytgan,
Nodau utgyrn y datgan;
Oedaf awr mewn hyfryd fan.

(D eisiau clywed yr emyn dôn "Clarach" a chwaraewyd wrth i'r Titanic suddo. "Wel, dyma hyfryd fan".)

TuDrawl'rLleuad
(20260406)

Crwydryn 'di mynd i'r lle mud - ag erchi
Disgyrchol ddychwelyd
O bau sy'n lân o ddrwg byd:
Amen am ddeugain munud.

(Llong ofod Orion yn diflannu tu draw i'r Lleuad.)

YTrydyddDydd
(20260405)

F'enaïd gwan, be' ddaeth i ganlyn ei gri
Ar groes yr anfadyn?
Drwy ras, codwyd yr Iesu'n
Rhodd Duw er mwyn rhyddhau dyn!

(Canu "Codwyd Iesu" yn y gwasanaeth y bore 'ma.)

YnUn
(20260404)

I bwyll uwch wrth ymbellhau - â noddaeth
O flynyddoedd golau;
Emaus dyn, Artemis Dau;
Geiriau'r hedd : un yw'n gwreiddiau.

(Wrth i'r Artemis II hyrddio'i hun tuag at y Lleuad yn ddiweddar, holwyd y gofodwyr am y rhaniadau dyfnion presennol ymysg pobloedd y Ddaear. Pa neges oedd ganddynt ar gyfer y ddynoliaeth? Atebodd Victor Glover drwy bwyntio a'i fys at ffenest y llong ofod yn cynnig golygfa aruthrol, unigryw-amryliw o'n planed, a dweud: "'Da chi'n edrych yn anhygoel. 'Da chi'n edrych yn brydferth. O 'fyny fa'ma, 'da chi hefyd yn edrych fel un bod. 'Da ni 'gyd yn un bobl.'")

GwenerYGroglith
(20260403)

Blas angar sydd i'r bara'n sŵn y gledd,
Gorfoledd rhyfela;
Hoel oferedd Calfaria'n
Sŵn y gledd, diwedd y da.

(Mae angen cofio neges cariad gymaint heddiw ag erioed.)

SulYBlodau
(20260403)

Ar y meini, grym enwau - meini mwyn
Mynwes cenedlaethau;
Byw heddiw y mae'r beddau,
Hafan brin atgofion brau.

(Glanhau'r beddau ym Mhantteg ac Eglwys Y Drindod, dydd Sadwrn diwethaf.)

ArDduAGwyn!
(20260401)

Caf hwyl yn myd cyfeilio - daw ceindeb
O g'wirdeb cytgordio,
Dewred wefr o daro Do:
Nid pwn, ond ffrind yw piano!

(Cyfeilio mewn cyngerdd gyda MM a Pedair nos Wener.)

Teulu
(20260322)

Hiraethus a serchus swydd - wynebu'r
Adnabod cyfarwydd;
Dathlu tras â blas penblwydd
Orig â 'ngyfnitherwydd.

(Cinio blynyddol cyn Pasg 'da J&G a J yn y Ffesant yn Neenton.)

Cyhydedd
(20260322)

Fel gwiwswyn, gwanwyn y gwir - a gruddiau'r
Golau a ddatgelir:
Helo i Alban Eilir,
Cawn wyneb haf cyn bo hir!

(Y dyddiau'n ymestyn yn amlwg.)

MoelSych
(20260320)



Heulwen o'r nef, a sefyll am oriau
Ar erwau tir euryll;
Eistedd wrth odre'r pistyll,
Llonni'n fawr o wawr tan wyll!

(Cerdded o Hendwr ger Cynwyd dros y Berwyn i Bistyll Rhaeadr a nôl, am y tro cyntaf erioed!
Bendigedig!)

YMur
(20260319)

Safant mewn un rhes ufudd i'm gwarchod,
I'm gwylio 'da'i gilydd;
Tarian ceidw Gwalia'n gudd:
Mi welaf dlysni'r moelydd.

(Rhedeg ar fore bendigedig.)

Ewynnol
(20260319)



Lle o ferw llifeiriol - lli' hogodd
Y Llugwy hynafol;
Dŵr gwyn ar ddisgyn, a'r ddol,
Rhiniad Rhaeadr Ewynnol.

(Cerdded 'da J o Fetws Y Coed I Dŷ Hyll a nôl 'ddoe.)

Jaro!
(20260319)



Efail si hynafol swyn - 'da'r awel
Ar droad yr olwyn
Daw min trawsnewidiad mwyn
Bore clên, gwên y gwanwyn.

(O'r diwedd!)

Y Berwyn
(20260314)



Anelaf at barth Bwrdd Arthur - hen gwrs
Reit corsiog yw'r llwybyr;
Dof â syniad reit difyr
I fwynhau pau'r eira pur!

Gwyn
(20260314)



Drwy'r hiraeth 'da Godre'r Aran - heb raid
Colli brawd o'r winllan;
Ar ei arch, teyrnged Marchan:
Gwyn y gŵr, a gwyn ei gân.

(Colli G. o MM.)

Gramadeg
(20260314)

Er oedi wyf, fe "gredaf fod" - y tâl
'Yw bod" dysg i'w chanfod;
Undydd, "gwelwyd bod" ceindod
Hyd bywyd, rhaid "credu bod"!

(Darllen llyfr gramadeg Peter Wynn Thomas a dysgu pryd mae defnyddio "bod" a "fod" ... er ei fod yntau'r cydnabod bod tipyn o amrywiaeth rhwng ysgrifennwyr profiadol!)

MawrMewnAParchABri
(20260314)



Nwyfog annog ei eneth - a gwirion
Bu'r gwryn drwy benbleth
Yn mynd i rhacso popeth:
Nid gwynfyd bu bywyd MacBeth!

(Mynd i weld MacBeth yn theatr Pontio neithiwr. Cynhyrchiad newydd gan gwmni Flabbergast.
Diddorol!)

ErGarwedYGwyntoedd
(20260313)

Arfau elw'r oes rhyfela - oes frau
Heriad ofnau dyfna';
Â'r hiraeth ar ei waetha'
O Dduw, mae popeth yn dda.

Yn y gwely'r oriau gwaela' - byw oes
O boenau, iseldra;
Â'r driniaeth ar ei waetha'
O Dduw, mae poeth yn dda.

Min burum yn y bara yw Duw,
Y deall sy'n para;
Gwyn pob gwryn a'th gara
O Dduw: mae poeth yn dda.

(Paratoi sgwrs i'r capel.)

ArosMae
(20360310)

Diogel yw'n diwygiad - bwyha'n ffydd,
O Lywydd goleuad;
I fyd heb gysur, tyrdd, Tad
Yw'n gweddi, rho ddatguddiad.

{Meddwl am sgwrs capel.}

Gwallgofrwydd
(20260309)

Y dwyfol sydd yn difa â thyfiant
Eithafiaeth y Shia;
Onid diawl Ayatola?
Yn ddi-ai, nid yw yn dda.

O ba reidrwydd yw'r brwydro, â meinwaith
Cymuned yn cwympto?
Difâd tras, pob gwas o'i go'
Ym mŵm, bŵm, bŵm y bomio.

(Meddwl am Iran.)

Kuga
(20260304)

O afael ffosilaidd ofid - tro dawn
Trydanol a wefrid!
Adloniant, llwyddiant nid llid
Ar wybr yw gyrru heibrid.

(Wedi plesio â'r car newydd wedi taith hwylus arall i Gaerhirfryn.)

Consart!
(20260302)

Ceidwaid y cwmni cadarn yn gydred,
Yfed yn y dafarn;
Bywhau doniau ym mhob darn
Huawdl Llanfair Talhaearn.

(MM yn cadw noson hwylus a chartrefol yn Llanfair TH nos Wener i ddathlu Gŵyl Ddewi.)

Yfory
(20260227)

Hel dydd heb au-wleidydda - eiliad falch,
Gweli fyd yn gwella
Oes a ddaw, cymdeithas dda
Yn furum yn dy fara.

(Oes newid ar droed yng ngwleidyddiaeth Cymru a Phrydain?)

PwdinDolig
(20260227)

Aethom at Huw a Bethan - nos o fêl
Byw'n Svalbard, penbwmpian
Yn sawr pwdin a saws arian
Yno'n twymo ger y tân.

(Dathlu'r 'Dolig eto 'da H a B neithiwr!)

Gordon&Denton
(20260226)

O dan ofid anifyr geiriau ffug:
Refform, bant â'ch gwewyr!
Ac i'r brain, llefain Llafur!
Cywion llon Gwyrddion a gur!

(Meddwl am yr isetholiad ym Manceinion heddi.)

MaedduBryste
(20260222)



Daw, fe ddaw, Abertawe - cam 'rol cam,
Dot com o gyd-chwar'e;
Dathlu llafar llenwa'r lle
Â'r *bros* 'di curo Bryste!!

(Y Swans yn ennill unwaith eto, a'r dorf yn mynd i'r hwyl ar y diwedd!)

LlynYFanFawr
(20260219)



Meitin swyn Cwm Tawe synn - hin hyfryd
Mis Chwefror 'di disgyn;
Deffro gwnaeth pen y dyffryn
I anrheg aur: eira gwyn!!

(Mynd am dro, ac i oifad, yn y Llyn gyda S.)

LônLlynBriane
(20260219)



Amen o Soar Y Mynydd - amen
Rhandirmwyn y celfydd;
Mynd i hwyl amen y dydd,
Elan amen Elenydd.

(Dreifio o Dregaron i gapel Soar Y Mynydd, i Randirmwyn i Lanymddyfri.)

MrJôns
(20260219)

Dewis rhyw alaw *Who*-aidd mae Eric,
Meurn melodiaidd;
Ymroddedig rhythmig wraidd
O Reggae, neu dôn Groegaidd?

(Côr Rh. yn canu o waith Eric J., a'r alaw yn debyg iawn i un o felodïau Dr. Who, i alaw o'r ffilm "My Big Fat Greek Wedding", a rhywsut i gerddoriaeth "Reggae".)

Antur!
(20260217)

O Dregaron i'r llonydd - bryn a phant,
Dilyniant o lonydd
Bro nirfana Gwalia gudd,
Egwyl unig Elenydd.

(Meddwl am fynd lawr i Dregaron, lawr i Lanymddyfri, a wedyn draw i'r Rhondda dydd Mercher!)

YRodYnTroi?
(20260215)

Rhaid deall mae o drallod - daw awen,
Rhaid newid cyweirnod!
Ni tranc, colli i'r Ffrancod:
Ymdrech fawr yn awr yw'r nod!

(Llygedyn o obaith heddiw? Hwyrach na, jyst optimistiaeth!)

Pitsa!
(20260215)

Ar ddiwedd dydd o wledda - i orffen,
Mwyn awen tsim'nêa;
Gwreichion undod diwrnod da
Yn atsain y gair: PITSA!!

(C. yn gwneud pitsa yn y ffwrn yn yr ardd neithiwr!)

PenblwyddArall
(20260214)

Eto, dathlu yw'r ateb - a gweled
I galon maboldeb;
Boi o boi! Dydd Dyfibêb
Clên, â'r wên ar ei wyneb!

(Penblwydd D. yn bump oed.)

GwaeFi
(20260213)

Oer elw, materoliaeth - rhain yw cryd
Byd o anwybodaeth
Haerllucaf gyfalafiaeth;
Fy llw, ni wyddwn ffordd waeth.

(Meddwl am "The Good Society".)

CymdeithasDda
(20260213)

Ein pos, rhyw anhapusrwydd - hwn a ddaw
O dduwch ansicrwydd;
Rhyddhad? Goleuad a lwydd:
Deigryn o garedigrwydd.

Ffaela hoen drwy ffolineb dadfeilio
Wrth rodio ystrydeb;
Trasiedi adnabi'r neb
O weld anghydraddoldeb.

Ein harf yw troi o derfysg - o ludded
Boblyddol, at awchus
Ganfyddiaeth, maeth yn ein mysg:
Undod rhyddid drwy addysg.

Ein swydd yw'r da sy'n llwyddo - swydd go wir,
Er mae hir pob aros;
Gorau foes ein hoes heb os
Awch i ddatrys yr achos.

(Dechrau darllen "The Good Society" gan Kate Picket, un o awduron "The Spirit Level" diweddar.)

Darogan ...
(20260209)

Mai ti yw'r mab i Aber-tawe, mai
Ti, Matos a'th hyder
Eiff â'r Swans i ffwr' i'r sêr.
Am orchwyl, rhacso Mercher!

(Mynd i weld y Swans. Ennill 4-0 â chwarae da yn erbyn Sheffield Wednesday.)

Swansea.com
(20260207)

Estyn mae'r cynwrf drosom, nwyd erfyn
Trawsffurfiol sydd ynom
A mad anwes amdanom:
Gwenu, canu'n y *Dot Com!*

(Disgw'l mla'n i weld y Swans 'fory, gyda Ch, D a T!)

EinTre'Ni
(20269206)

O bersawr gwawr yn gori hyd effaith
Diffodd y goleuni,
Tirion han oedd i'n tre' ni,
Mentrai, canai mewn cyni.

(Mynd i weld "Our Town" gyda Michael Sheen yn Llandudno.)

Penllanw
(20260204)

Yn eiddgar i'r tonnau garw - miri
Meirch y môr yn galw;
Beili hyf, halabalw,
Llawenydd mewn penllanw!

(Oifad - yn ofalus - ym Menllech ar benllanw uchel iawn!)

YrAelwyd
(20260204)

Wâc 'rol swper, bron â fferu - rhewynt
Yn rhuo o bobtu;
Dyma'r tân i dwymo'r tŷ,
Cun y nos i'n cynhesu!

(Tanau ar aelwydydd Rh a ChwtYWiwer yr wythnos hon.)

MêriPopins
(20260131)



Ar y stryd, aros trydar sain apêl
Ger San Paul yn gynnar;
Daw'r geiriau gorau o gân
Drwy oedi i fwydo'r adar.

Ar goll yn môr o gellwair - ôl diwyg
Melodïau disglair;
Ag awen hoenus gywair
Gwirioni 'm miri sioe Mair.

(Yn Lerpwl 'ddoe. Mynd i Oriel Walker, can pryd o fwyd Siapaneaidd yn Sapporo, a wedyn joio yn yr Empire. Roedd "supercalifragilisticexpialidocious" yn anhygoel, ond yn ormod o syllafau am englyn, gwaetha'r modd!! Gwych!!)

ICE
(20260130)

Pla ym Minneapolis - yn y lle
Bu ddoe'n lleu, a heddi'
Sydd dduwch casa' ddewis
Gwŷr ICE, y pla o'r gor-is.

(Does dim geiriau i ddisgrifio'r hyn sy'n digwydd.)

DilynYffordd
(20260128)

Ar y maes, crwydro'm moeseg a difyr
Lwybr defaid, lôn gwartheg;
Mynd 'da'r awel dawel deg
Er y llaid, rhaid yw rhedeg.

(Rhedeg i Rewl a nôl.)

Carco
(20260128)

Gwen a Dyfan, gwin defod - gwin hudlon
O'r genhedlaeth isod;
Mwynhau eu nwyfau yw nod
Gorchest penwythnos gwarchod!

(Carco'r penwythnos diwethaf.)

Llanelwy
(20260128)

Yn gwlwm o'r hen galan - i ganu
Plygeiniol criw Marchan;
Hynod arlwy'r gadeirlan
Yn disgwyl oed Iesu glân.

(Gwasanaeth hyfryd nos Wener.)

QBism
(20260128)

Ein byd o oddrychol wybodaeth - a ffaith,
Nid ffwythiant realaeth;
Ffo gwywog dehongliad gwaeth
O 'nabod dirwedd QBaeth.

(Trafod QBism yn y ddarlith nos Lun, ond yn weddol sicr na wnaeth neb gydio'n y syniad!)

CofioGwenda
(260127)

O'i dawn, daeth nodau lona - un o dòn
O donau, cymanfa;
Pader i geinder Gwenda:
Hedd i hon, a siwrnai dda.

(Angladd H.T.C. heddiw.)

RhedegNeithiwr
(20260127)

Gwahanol, mynd heb olau - a lledrith
Twyllodrus yw'r llwybrau;
Ôl isod o eirlysiau
Yn eu bri lleu'r gwynion brau.

(Rhedeg yn lle peldroed neithiwr, o achos y ddarlith i Gymdeithas Wyddonol Caerdydd.)

MaedduBlackburn
(20260123)

Perfformiad canmoladwy - yn hapus,
Vipo daeth i'n hadwy;
Er taer waith croesi'r trothwy,
Hawdd iawn oedd ennill o ddwy!

(Y Swans yn maeddu Blackburn o dair i un, gan ennill o fwy nag un gôl am y tro cyntaf ers amser!)

Ripâro'rGlwyd
(20260122)

Angen ailosod cyngor rhiniog lân
I'r hen glwyd yn angor;
Aeth igian wrth ei hagor
Ar y naw, yn ddistaw ddôr!

(Trwsio'r glwyd cefn y GG gyda D drws nesa' a T.)

BoreDa!

(20260116)

Bore hoen, y grug a brwynen - i gôl
Hen gelyn a'r ddraenen;
Pryd awr ar gopa'r Darren,
Achub awr 'da'r byd uwchben.

(Haleliwia!)

Papuro

(20260116)

Gwaith diflas, torri cyn pastio - a loes
Ailosod 'rol trimio;
Yn dair, pair y papuro,
Yn siŵr, eiff y gŵr o'i gô'!!

(Tri diwrnod o bapuro yn GC.)

AilNadolig

(20260115)

Hynod ŵyl, ail Nadolig - o'r galon
Daw'r gwylliau hwyredig;
Gwyn yw pau ein hwylliau i,
Gwyn ein nodyn unedig.

(Dathlu'r Nadolig 'da'r teulu yn lonawr - hwyl â dweud y gwir!)

Rhagolygon

(2026018-9)

Cyhoeddi'r gwir neu'r gwirion ac olrhain
Tebygolrwydd gyson
O'r goruwch, a'r ddaear gron
Yn boddi dan don rhybuddion!

(Yng Nghaerhifryn, a rhagolygon tywydd ych-a-fi, ond dim i'w weld fan hyn!)

Blwyddyn Newydd

(20260104-07)

O naws Praha ddinasol - o fynwes
Skřivanaidd warchodol,
Camau adref cymhedrol:
Mwynhau o gael camu'n ôl.

Oedi mwyn troed y mynydd - hwyliog oed
Er ail-godi awydd:
'Nol i'r nos, niwl, eira, nudd
Yn hau'r golau 'da'n gilydd.

(Gartref eto ar ol pythefnos hwylus yn Praha.)